



Inatsisartunut Ilaasortaq
Jens B. Frederiksen
Demokraatit

Silap pissuaanut naleqqussarnissaq pillugu § 37 naapertorlugu apeqqummut akissut

Asasara Jens B. Frederiksen

Apeqqtinnut qujanaq, taakkulu matuma kinguliani akissuteqarfigissavakka.

1. Suliniutit suut Naalakkersuisut aallartissallugit eqqarsaatigaat uagut inuiaqatigiittut nunarsuarmi silap pissusaanut naleqqussallaqqinnerunissarput anguniarlugu?

Periarfissaq iluatsillugu sammisamut pingaarutilimmut matumunnga soqutiginnikkavit qutsaviginiarpakkit, tamatumalu peqatigisaanik erseqqissassallugu silap pissusaanut naleqqussarnissaq Naalakkersuisut pingaartimassuk.

Paasisat ilisimatusarnerullu takutippaat, Kalaallit Nunaanni silap pissusaata allanngoriartorneri sukkasoorujussuarmik ingerlasut. Tamanna ilaatigut kissassutsit agguaqatigiissinnerisa qaffasinnerulerneranni, nittaalartarnerata siallertarneratalu allannguuteqarneranni, anorit sakkortunerulerneranni aammalu sermersuup ilorpariartornerani takuneqarsinnaavoq. Silap pissusaata allanngoriartornerata sunniutai, pitsaasuuppata pitsaasuunngippataluunniit, pillugit oqallinnermik pilersitsinissaq ersarinnerulersitsinissarluk Naalakkersuisut kissaatigaat, taamaalilluta inuiaqatigiittut allannguutinit malugisariikkatsinnut takkukkumaartussanullu akiuussinnaanerulersinnaagatta.

Silap pissusaata allanngoriartornera umiarsuit angallannerinut – suliassaqarfimmut inuiaqatigiinnut pingaaruteqarluinnartumut - qanoq sunniuteqarnersoq pillugu misissueqqissaarnermik aallartitsiniarlutik Naalakkersuisut aalajangerput. Misissueqqissaarnermi silap pissusaata allanngoriartorneranut atatillugu umiarsuit angallannerini unammilligassat periarfissallu aallunneqassapput. Umiarsuit angallannerinik misissueqqissaarnermi suliassaqarfik taanna silap pissusaani allannguutinit qanoq sunnerneqarnersoq immikkut misissussavarput. Taamaalilluta suliniutit suut iluaqutaasumik aallartinneqarsinnaanersut misissornissaannut periarfissarsissaagut. Aammattaaq misissuinermi silap pissusaanut sunniutininik annikillititsinnaanermut periarfissat misissussavagut, taakkununga umiarsuit angallannerinni gassinik silaannarmik kissakkiartortitsisunik aniatitsinerisa annikillisinissaa periarfissaqarnersoq ilaatinneqassalluni. Misissueqqissaarnissaq Peqqissutsimut Attaveqarnermullu Naalakkersuisoqarfik suleqatigalugu ilusilersorneqassaaq, kiisalu ilaatigut Royal Arctic Line suleqatigalugu ingerlanneqassalluni.

13-09-2013
Sags nr. 2013-088719
Dok. nr. 1334238

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Silap pissusaanut misissueqqissaarnissaq suliassaqaarfimmut tassunga 2009-mi aalajangiiffigisaasut ilagaat, ineriartorteqqinnissaalu Naalackersuisunit suli sulissutigineqarpoq. Taamatut aalajangiinerup naluneqanngitsutut kingunerisaanik Kalaallit Nunaanni suliassaqaarfinni pingaarnepaani silap pissusaanut naleqqusnaanissaq pillugu nalunaarusiortoqartussaavoq, taamaalillutalu tullerriaartumik ingerlaavartumillu silap pissusaata allanngoriartornerata inuiaqatigiinnut sunniutai misissoqqissaarsinnaalissavagut, aammalu sunniiniutissat, unammilligassat naammassiniarlugit atorneqarsinnaasut suussusersiniarsinnaalissavagut, kisiannili aamma periarfissat, allanngoriartornerat attuumassuteqartut atorluarniassallutigut. Tamatuma kingorna inuiaqatigiinni suliassaqaarfinni qitiusuni allani assingusunik nalunaarusiortoqarnissaa anguniagaavoq.

Tamatuma peqatigisaanik qanoq iliorluta naleqqussaanermut kommunit suleqataatissinnaanerlugit misissuilluta aallartippugut. Qanoq iliorutta pitsaanerpaamik ingerlatsisinnaanerluta oqaloqatigiinnermik aallartitsinissaq siunertaralugu, Naalackersuisoqarfiup ukiumoortumik Teknikerit/Pilersaarusiortartut isumasioqatigiinnerinut, upernaap tulliani Kalaallit Nunaanni katersuuffiusussamat peqataatitsinissaa naatsorsuutigineqarpoq.

Tamatuma saniatigut Ineqarnermut, Pinngortitamut Avatangiisinullu Naalackersuisoqarfik Issittumi Siunnersuisoqatigiit ataanni naleqqussaanarluni sulinerlut peqataatitsissaaq, tassanilu kalaallit/canadamiut imartaanni (Davisstrædet aamma Baffinbugten) nunanilu taakkununga atasuni silap pissusaanut naleqqusnaanissaq pillugu nunat immikkoortuini misissuinerneq aallartitsisoqartussaavoq. Ilisimatusarnerup aallunneqarnerata ingerlaannarneratigut, aammalu silap pissusata allanngoriartornera pillugu ilisimatusarnerit annertuut, Kalaallit Nunaanni ingerlanneqartut atorlugit naleqqussaanarluni suliniutinut ilisimatusarnikkut tunngavissanik nukittorsaaqataavugut. Silap pissusaata allanngoriartornerani suut piareersarfigisinnaanerigut ilisimalissagutsigu, aammalu suliniutit naleqqunnerpaat nassaarissagutsigit ilisimatusarneq misissuinerlu pinngitsoorneqarsinnaanngillat.

2. Naalackersuisut saqqummiusserusunerlutik silap pissusaanut naleqqusarnissamat Ineqarnermut, Pinngortitamut Avatangiisinullu Naalackersuisup Ittoqqortoormiini atorfimminut atatillugu angalanermini naammasseqqammersumi isumassarsiai pillugit?

Ittoqqortoormiinit tikeraarninni ministereqatiga danskiusoq peqatigalugu Ittoqqortoormiini innuttaasut ulluinnarni inuunerminni silap pissusaata allanngoriartornera qanoq malugisimaneraat pillugu oqaloqatiginissaannut periarfissarsivunga. Silap pissusaata allanngoriartornerata sunniutai sumiiffimmi aalisartunut piniartunullu malunniuteqalereerput. Ittoqqortoormiini ataatsimiinnermi assersuutinit aalajangersimasunit erseqqissarneqartoq tassaavoq, apisarnerata sikusarneratalu allanngornera nannunniarnermi aqqudit sunniuteqarfigisimagai, tamatumalu kingunerisaanik sinerissamat qanittumut aalisarnermi atugassarititaasut allanngorsimasut.

Tamatuma saniatigut silap pissusaata allanngoriartornera qanoq ilillutik aalisarnermik piniarnermillu inuussutissarsiuqarnermut sunniuteqarnerat nassuiaatigineqarpoq, tassami qaammatisiutit malillugit ullut piniariartarfiit allanngorsimapput. Tamatuma

kingunerisaanik aalisartut piniartullu silap pissusaata allanngoriartorneranut naleqqussartariaqarsimapput, isertitsissutaasinnaasut allat inuussutissarsiutit nalinginnaasunut ataqatigiissittariaqartarsimallugit.

Tamatumani takuara silap pissusaata allanngoriartornera inuiaqatigiinni eqaatsumik aaqqiinissamik allannguinnissamullu piareernissamut pisariaqartitsinermik malitseqartoq. Taamaattumik siunissami suliniutit ilusilerneqartariaqarput, inuit ataasiakkaat, matumanilu aalisarnermik piniarnermillu inuussutissarsiuteqartut naleqqussarsinnaassusaannik nukittortitsisussanik.

Innuttaasut ulluinnarni inuunerminni silap pissusaata allanngoriartorneranut atatillugu ajornartorsiutit naapittagaat pillugit, aammalu pissutsinik nakkutillinnissap pisariaqarnera pillugu Ittoqqortoormiini oqaloqatigiinnerit paasinninnerulersippaannga. Pitsaanerusumik alapernaarsuinikkut aammalu paasissutissat pissarsiarineqarsinnaanerisigut pitsaanerusumik naleqqussaannissamut isumannaassutsillu qaffatsinneqarnissaanut periarfissiisoqartussaavoq. Tamatumunnga atatillugu isumaqarpunga, alapernaarsuinerup annertunerulernera ilaatigut aalisartut piniartullu ataasiakkaat, pinngortitamik pisuussutsinillu, taamaalillunilu aamma allannguutininik paasisimaarinnilluartut takusartagaannik tunngaveqartariaqartoq.

Maluginiassallugu pingaaruteqarpoq, silap pissusaata allanngoriartornerata sunniutai sumiiffimmiit sumiiffimmut assigiinngitsuummata, tikeraarninnilu oqaatigineqartunit pissarsiarisama ilagaat, nunap immikkoortuini najukkanilu pissutsinut taakkunani atuuttunut naleqqussaannissap sulissutigineqarnissaa pisariaqartinneqartoq. Tassani silap pissusaata allanngoriartornerata sumiiffimmiit sumiiffimmut sunniutaat assigiinngitsut kisimik pineqanngillat, tamannali aamma pissusiviusunut aalajangersimasunut sunniuteqarfigisaannut, allanngoriartornernullu allanut atuuttunut atasutut isigineqassaaq. Silap pissusaanut naleqqussaannerit teknikkikkut aaqqiissutissat imaluunniit siunissami silap pissusaanut tunngatillugu eqqornerusunik eqqoriaasernerit kisiisa ikiortigalugit isumagineqarsinnaanngillat. Innuttaasut silap pissusaanut naleqqussarnissamut suliniutinut ilaatinneqarnissaat, aammalu takusaasa, annilaangassutaasa isumassarsiaasalu tusaaneqarnissaat pingaaruteqarpoq.

Inussiarnersumik inuulluaqqusillunga
Med venlig hilsen

Mette Lynge